

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaat tamakkerlugu nunaqarfiit ineriartortinneqarnissaannut ukioq 2050-imut pilersaarummik kingusinnerpaamik UKA 2027-mut suliaqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarummi sullissinernut tunngaviusunut, attaveqaasersuutitut, inuussutissarsiornikkut periarfissanut pitsaasunillu ineqarnissamut naligiimmik periarfissaqarnissaq qitiutinneqassapput.

(Inatsisartunut ilaasortaq Kuno Fencker, Naleraq)

Tunngavilersuut:

Ukiopassuarni Kalaallit Nunanni nunaqarfiit ilusiliinermut tunngasumik kinguariarnernik, atortutigut ingerlatanut, najugaqarfinnut aammalu inuiaqatigiinni pingaarutilinnut sullissinermut - soorlu peqqinnissamut ilinniagaqarnermullu - ajornartorsiuteqarnernik eqqorneqartarput. Ineriartorneq innuttaasunik agguataarnerup naleqqutinninneranik, nuuttarneq aammalu nunatsinni avinngarusimasuni atugarliornerup annertusiartorneranik kinguneqarpoq.

Nunaqarfiit tamarmik Kalaallit Nunaanni pissutsit aallaavigalugit najukkamilu piginnaatitaaffeqarlutik 2050-ip tungaanut ineriartortinneqarnissaat qulakkeerniarlugu anguniagalimmik piviusumillu pilersaarusiornissaq pisariaqarpoq.

2050-imut pilersaarummi ilaatigut makku ilanngullugit imaqartariaqarpoq:

- Atortutigut ingerlatanut aningaasaliinerit (talittarfinnut, aqqusernit, pilersuinnermut attaveqaatillu)
- Ineqarnermi nutaaliorneq kiisalu nukissiornikkut iluarsartuussineq
- Peqqinnissaqarfimmut ilinniartitaanermullu periarfissaq pitsanngorsarneqarnissaat
- Sumiiffinni aalisarneq, takornariaqarneq inuussutissarsiornierlu qitiutillugit aningaasarsiornikkut ineriartortitsineq
- Atuisunut akiliuteqartitsineq aammalu sumiiffinniit tapiissuteqartitsineq piginnittuunerup misiginissaa pilersinniarlugu
- Aningaasaliinerit ersarissumik pingaarnersiorneqarnerat kiisalu suliniutinik immikkoortiterilluni ingerlatsineq
- Pisortanit, namminersortunit nunanilu allanut aningaasaateqarfiusunit aningaasaliissutit ilanngullugit aningaasatigut pilersaarusiornermi periusissaq

2050-imut pilersaarummi qulakkeerinnittoqassaaq, Inuit tamarmik - najugaqarfiat apeqqutaatinngu - pitsaasumik inuuneqarnissamut siunissamullu pijuartitsisumik, naligiinnermut tunngasumik sumiiffimmilu aalajangiiffigisatigut tunngaveqartumik periarfissaqarnissaat.

Pisortanut aningaasatigut allaffissornikkullu kingunerisassat

Siunnersuutip suliarineqarnerani naatsorsuutigineqarpoq pisortat ingerlatsivii eqqarsaatigalugit nalinginnaasumik AC-fuldmægtig-imik ukiuni marlunni sulinnermut naleqassasoq. Tassaassaaq 1.000.000 koruuninik akeqassalluni.

Siunnersuutip siunertaasa piviusunngortinneqarnissaa piffissami 2050-ip tungaanut aningaasaliinissamut pisariaqartitsinermik annertuumik kinguneqassaaq, taamaattumik aningaasartuutit ukiuni arlalinni aningaasaliinissamut pilersaarutit, naalagaaffiup taarsigassarsiai, naalagaaffiup aningaasaateqarfii, nunat tamalaat akornanni bankeqarfiit aningaasaateqarfiillu kiisalu EU-mi program-it aqqutigalugit matussuserneqarnissaat naatsorsuutigineqarsinnaavoq.

Namminersorluni inuussutissarsiuteqarnermut aningaasatigut allaffissornikkullu kingunerisassat

Pilersaarutit suliarineqarnerani namminersortumik inuussutissarsiuteqartunut kingunerluutaassutigineqassanngilaq.

Siunnersuummi siunertat piviusunngortinneqarnerisa kingunerisaanik nunaqarfinni ineriartortitsinermik suliaqarfiusut angisuut pilersinneqarsinnaapput, aammalu nunatsinni suliffeqarfiutillit, soorlu sanaartorneq, assartuineq, aserfallatsaaliineq aammalu pilersuineq pillugu periarfissagissaarnerulernissaat qulakkeerneqarsinnaavoq. Taakku saniatigut inuussutissarsiutit, soorlu aalisakkanik tunisassiorfiit, pitsaanerumik attaveqaatitigut ingerlatseriaatsinik pitsaanerulersitsisinnaasumik iluaquteqarsinnaalissapput.

Innuttaasunut aningaasatigut allaffissornikkullu kingunerisassat

Pilersaarutit suliarineqarnerani innuttaasunut kingunerluutaassutigineqassanngilaq.

Siunnersuummi siunertat piviusunngortinneqarnerisa kingunerisaanik najugaqarnissamut, peqqinnissamik sullissinnermut, ilinniagaqarnissamut aammalu inuussutissarsiuteqartarnissamut periarfissat pitsaanerulersinneqarsinnaapput, taakku



innuttaasut najugaqarnerannik nukittorsaataassapput, suliffissanik pilersitsissallutik
aammalu naligiinnginneq annikillisassallugu.